
Ordinaziun davart la scola media professiunala (OSMP)

dals 02-09-2008 (versiun dals 01-10-2012)

sa basond sin l'art. 45 da la constituziun chantunala¹⁾ e sin l'art. 19 da la lescha davart las scolas medias²⁾

relaschada da la regenza ils 2 da settember 2008

1. Disposiziuns generalas

Art. 1 Object, champ d'applicaziun

¹ Questa ordinaziun regla l'execuziun da las disposiziuns da la conferenza svizra da las directuras e dals directurs chantunals da l'educaziun publica per la scola media professiunala che sa basan sin la cunvegna da diploms, en spezial il cuntanscher il certificat da scola media professiunala e la maturitad spezialisada.

² Reglaments da scolas medias privatas che divergeschan da disposiziuns en il champ d'applicaziun da questa ordinaziun basegnan l'approvaziun da la regenza.

Art. 2 Applitgablada subsidiara da la OGim

¹ Uschenavant che questa ordinaziun na cuntegna naginas regulaziuns expressivas, vegnan applitgadas conform al senn las disposiziuns da l'ordinaziun davart il gimnasi³⁾.

Art. 3 Durada da la scolaziun

¹ La scolaziun per cuntanscher il certificat da scola media professiunala dura per regla 3 onns. Suentar la finiziun cun success po vegnir fatga la maturitad spezialisada entaifer 1 onn.

¹⁾ DG [110.100](#)

²⁾ DG [425.000](#)

³⁾ DG [425.050](#)

* tabellas da las modificaziuns a la fin dal relasch

Art. 4 Plan d'instrucziun

¹ L'instrucziun sto vegnir dada tenor ils plans d'instrucziun che vegnan relaschads u approvads da la regenza e ch'èn structurads tenor las prescripziuns da la conferenza svizra da las directuras e dals directurs chantunals da l'educaziun publica.

2. La scola media professiunala

Art. 5 Champs da professiun, praticum ordaifer la scola

¹ Ils champs da professiun èn:

1. pedagogia cun ils roms musica II, pedagogia/psicologia; furma e color;
2. lavur sociala cun ils roms economia e dretg, pedagogia/psicologia, economia da chasa;
3. sanadad cun ils roms biologia umana, pedagogia/psicologia, fisica e chemia.

² A la fin dal segund onn da scolaziun absolvan las scholaras ed ils scholars in praticum da 4 emnas ordaifer la scola. Il manaschi da praticum è activ en in dals champs da professiun da la scola media professiunala.

Art. 6 Roms da promoziun

¹ Ils roms da promoziun èn l'emprima lingua (Deutsch, rumantsch, italiano), la segunda lingua, anglais, matematica, biologia, fisica e chemia, geografia, istorgia ed instrucziun civica, furmar creativ, musica, psicologia/tscherna da professiun sco er en il segund e terz onn ils trais roms dal champ da professiun elegi.

Art. 7 Cundiziuns da promoziun

¹ Ina scolara u in scolar vegn promovì la fin da l'onn da scola, sch'i na vegnan betg fatgs en ils roms da promoziun dal segund attestat dapli che dus puncts e mez minus e sche la media da las notas da promoziun cuntanscha la valur 4.00.

Art. 8 Lavur independenta

¹ En il terz onn da scolaziun fan e preschentan las scholaras ed ils scholars – sulets u en ina gruppa – ina lavur independenta en scrit u commentada en scrit.

² La direenziun da la scola regla ils detagls per far e per valitar questa lavur.

Art. 9 Admissiun a l'examen final

¹ L'admissiun pretenda per regla d'avair frequentà ina scola media professiunala en il chantun Grischun durant almain ils 2 ultims onns avant l'examen final e prestaziuns suffizientas per ina promoziun en la classa finala.

Art. 10 Roms da l'examen final

¹ Examinads en scrit vegnan l'emprima lingua (Deutsch, rumantsch, italiano), la segunda lingua, matematica, in rom che vegn fixà da l'uffizi sin proposta da la direcziun da la scola or dals sectur d'emprender da las ciencias natiralas, da las ciencias socialas u da las activitads musicas e dal sport sco er in rom relativ al champ da professiun.

² Examinads a bucca vegnan l'emprima lingua, la segunda e la terza lingua; ultra da quai fixescha l'uffizi sin proposta da la direcziun da la scola in rom d'examen che n'è betg anc vegnì examinà en scrit or dals secturs d'emprender da las ciencias natiralas e da las ciencias socialas sco er in rom d'examen relativ al champ da professiun.

Art. 11 Notas dals examens finals

¹ Per ils roms ch'èn vegnids examinads en scrit ed a bucca vegn calculada la nota da l'examen sco media betg arrundada da las notas dals dus examens.

² En il certificat da scola media professiunala vegnan messas notas entiras e mesas notas.

Art. 12 Reussida da l'examen

¹ La reussida da l'examen final sa drizza tenor las disposiziuns da la conferenza svizra da las directuras e dals directurs chantunals da l'educaziun publica.

Art. 13 Concepziun dal certificat da scola media professiunala

¹ En il certificat da scola media professiunala figurescha sco emprima lingua ina lingua chantunala, sco terza lingua l'anglais, sco champs da professiun la pedagogia, la lavur sociala u la sanadad. El po cuntegnair supplementarmain la nota per l'instrucziun d'in instrument sco er il renviament al lieu ed al manaschi dal praticum ordaifer la scola.

3. Las maturitads spezialisadas en sanadad ed en lavur sociala**Art. 14** Admissiun

¹ Titularas e titulars d'in certificat d'ina scola media professiunala en ils champs da professiun sanadad u lavur sociala pon far la maturitad spezialisada correspondententa tenor las directives da la conferenza svizra da las directuras e dals directurs chantunals da l'educaziun publica.

Art. 15 Lieus da scola e da l'examen final

¹ Il lieu da scola per far la maturitad spezialisada en sanadad è la scola mercantila Surselva.

² Il lieu da scola per far la maturitad spezialisada en lavur sociala è la scola chantunala grischuna.

³ Il lieu, nua che l'examen final vegn fatg, è la scola media spezialisada respectiva.

Art. 16 Plan d'instrucziun, examens, notas dal rom

¹ La scolaziun ed ils examens sa basan sin las disposiziuns da la conferenza svizra da las directuras e dals directurs chantunals da l'educaziun publica per la maturitad spezialisada dal champ da professiun sanadad respectivamain dal champ da professiun lavur sociala. Il plan d'instrucziun vegn relaschà da la regenza.

² Mintga rom da la scolaziun per la maturitad spezialisada vegn terminà cun in examen e dat ina nota dal rom che vegn arrundada sin mesas notas.

Art. 17 Prestaziuns en il praticum, lavur da maturitad spezialisada

¹ En directives regla il departament en spezial ils detagls davart il praticum e davart la lavur da maturitad spezialisada.

4. La maturitad spezialisada en pedagogia

Art. 18 Admissiun

¹ Titularas e titulars d'in certificat d'ina scola media professiunala en il champ da professiun pedagogia pon far la maturitad spezialisada correspundenta.

Art. 19 Lieu da scola

¹ Il lieu da scola per far la maturitad spezialisada en pedagogia è la scola media evangelica da Schiers.

Art. 20 Collavuraziun dal lieu da scola e da la scola auta da pedagogia dal Grischun

¹ La direcziun da la scola media evangelica da Schiers collavura cun la direcziun da la scola auta da pedagogia.

² Suenten avair consultà la direcziun da la scola auta da pedagogia fixescha la scola media evangelica da Schiers il termin d'annunzia per la scolaziun per la maturitad spezialisada.

Art. 21 Plan d'instrucziun, examens, notas dal rom

¹ La scolaziun ed ils examens sa basan sin las disposiziuns da la conferenza svizra da las directuras e dals directurs chantunals da l'educaziun publica per la maturitad spezialisada dal champ da professiun pedagogia. La scolaziun è structurada en moda modulara. Il plan d'instrucziun vegn relaschà da la regenza.

² Ils roms d'examen da l'emprima lingua e da la segunda lingua èn duas linguas chantunalas u ina lingua chantunala ed englais. *

³ Mintga rom da la scolaziun per la maturitad spezialisada vegn terminà cun in examen e dat ina nota dal rom che vegn arrundada sin mesas notas.

Art. 22 Lavur da maturitad spezialisada

¹ Durant la scolaziun han las candidatas ed ils candidats da rediger ina lavur da maturitad spezialisada. La valitaziun da la prestaziun per la lavur da maturitad spezialisada dat ina nota dal rom che vegn arrundada sin mesas notas.

² Per l'admissiun als examens finals sto la lavur da maturitad spezialisada vegnir validada almain cun la nota 4.0. Ina lavur da maturitad spezialisada ch'è insufficienta po vegnir curregida ina giada.

³ En directives regla il departament en spezial ils detagls davart la lavur da maturitad spezialisada.

Art. 23 Organisaziun da l'examen

¹ Ils examens vegnan organisads e realisads da la scola media evangelica da Schiers.

² L'uffizi determinescha las expertas ed ils experts da l'examen.

5. Disposiziuns finalas

Art. 24 Execuziun

¹ L'execuziun è chaussa da l'uffizi.

Art. 25 Aboliziun dal dretg vertent

¹ L'ordinaziun davart la scola media professiunala dals 26 d'october 1999⁴⁾ vegn abolida.

Art. 26 Entrada en vigur

¹ Questa ordinaziun entra retroactivamain en vigur il 1. da settember 2008.

⁴⁾ CUL 1999, 4547; CUL 2003, FUC 2162; CUL 2004, FUC 2774 e CUL 2005, FUC 2406

Tabella da las modificaziuns - tenor conclus

Conclus	Entrada en vigur	Element	Modificaziun	Publicaziun en la CUL
02-09-2008	01-09-2008	relasch	emprima versiun	-
16-04-2012	01-10-2012	Art. 21 al. 2	midada	-

Tabella da las modificaziuns - tenor element

Element	Conclus	Entrada en vigor	Modificaziun	Publicaziun en la CUL
relasch	02-09-2008	01-09-2008	emprima versiun	-
Art. 21 al. 2	16-04-2012	01-10-2012	midada	-